

bio probari potest, quoniam in Libro *de Natura Humana*, Cap. 9. §. 15. aperte docuit ipsam libidinis voluptatem, ex parte quidem esse voluptatem animi, inde scilicet perceptam quod quis alteri se placere sentiat. Absurdissimum autem est, quod voluptatem animi agnoscere exinde sumi, quod alteri gratum quiddam fieret uni & in re levissimi momenti, quum interim non agnoscat voluptatem animo humano majorem inde nasci, quod plurimis simul impensius gratificemur, cum illorum & mentibus & corporibus inservimus bonum commune procurando per fidem, gratitudinem & humanitatem, etiam cum non eidem potestati Civili subjiciamur.

Denique in libro *de Homine*, Cap. 11. §. 14. ubi de industria in bonis quodnam majus aut minus sit, investigat, aperte testatur majus esse (cæteris paribus) quod pluribus Bonum quam quod paucioribus.

CAPUT IV.

De Dictaminibus practicis.

PRæmittendum est huic capiti, non omnes hominum actus dictamina, aut notiones dictaminibus æquivalentes supponere. Apprehensiones enim primæ, & motus quidam spiritum seu imaginationes, nonnunquam etiam motus Musculorum, ut nictus Oculorum, vel subitanea ab amicis resilitio sine dictamine fieri videntur; plurimi etiam infantis actus, ut comparationes, judicia &c. de jucundis & noxiis, quibus tamen the-